

PAULO ME LETA PILIPI ÄTRUNGA BINAME BIME BAU ME

1 ¹ Cane Paulo säne lui te yoogärenine ai leta ne. Timoti agesa cane cama; cine lui Yeesu Keriso me kaakesea bägrä gegi.

Agesa căme mene iyeta Pilipi cewe ätrunga ingle biname bime bau me, weene lui cina Keriso Yeesu cabu inajininige, piyepu ai mene cuta ätrunga ingle mope biname piyepu nuuja ätityera biname bime bau me.

² Acejiyame mime Babe piyepu Yageyame Yeesu Keriso, teeme miiji te weeme cabu lenajame piyepu teepi weebibine poode ceerame.

Paulo Irecu Ätumutige Pilipi Cewe Ätrunga Ingle Biname bime täापume

³ Iyeta padare cane liba weeme täापume ngenе jwaatwananune, cane Acejiyame ne eso yäacărune weeme täापume. ⁴ Cuta piyepu iyeta padare cane liba iyeta weeme täापume irecu lätumutanune, cane ngenecu gege cama jaawenune, ⁵ ingle weene cebine lipu nätityäruye Miiji Mene cängena jajanename pui bimu cabu ca weene liba niinäce itu jitrungujiye ngälu page. Eso! ⁶ Yoo, cane toraca umle gäne egä Acejiyame lui te jegednuji ai miiji kaakesea ne weeme cabu, tabe cuta jewenenige ngälu teeme apira Yeesu Keriso me acnenuta bimu cabu. ⁷ Weene căme ngenecurage binamewale gemi, cuta cane miiji gyene pepu asicnentame weene iyeta poto cidi me, ingle weene ai miijirage kaakesea ne cane cama gigri jaawenanuye, Acejiyame lui kaakesea cebine ituge ceera page wawename krokeciye mete cabu, cuta piyepu niinäce padare cabu, cane liba waatnetnäjepene Miiji Mene ne toraca me awabu-dnitame biname cina cängena ätrungame. ⁸ Acejiyame umle ai mene lui toraca gyene egä căme singi iyeta weeme täापume lui Yeesu Keriso me singi pana gyene.

⁹ Cane weeme täापume irecu lätumutanune egä weeme owecu te baborage äbitame, piyepu umleumle cama egä lui mule gemi toraca conocäco, ¹⁰ naace täापume weene piba ibibi läbitinuye mule bine cängena atraname. Weene piba conocäco cirege aclajuta Keriso

me acnenuta bimu padare cabu, ¹¹cuta piba weeme cabu piti nemi toraca miijirage mule Yeesu Keriso taatu lui bine weeme ireclota cabu yaacranemuge, naace täápume biname cina Acejiyame ne awepyeräjame piiyepu teeme jamyacu apaclyera peei mule cabu päpäname.

Toraca Ireclota Agesa Keriso me Kaakesea Wawename

¹²Cäme ätrunga binamewale, cane singi gäne weene umle äbitame egä iyeta gwidape lui cina cäme bau ituge äbita, Miiji Mene te peei cabu ca babo itu läbitepi. ¹³Siige, peei name pi iyeta awamuta biname piiyepu iyeta nuuja biname lui ama, teepi umle gemi egä cane krokeciye mete cabu säne, ingle cane Keriso täápume kaakesea jewenenine. ¹⁴Yoo, cäme krokeciye mete lenaja cabu ca mime bucurage binamewale cina Yageyame cabu ngenecu kokre itu läbitipesi, siige teepi wälu cäco äbitininisi Acejiyame me mene iicaname.

¹⁵Yoo toraca, poto cina mene jaajananemusi Keriso poto cidi me teeme niiyorage asicnenta cabu ca, ingle teepi gege lica cäme kaakesea lipu baborage itu läbitepi, piiyepu teepi mene ca läsädaninusi. Yepä, nuuja cina asicnenta miiji cabu ca teeme mene jaajananemusi. ¹⁶Teepi miijirage singi cabu ca jaajananemusi, ingle teepi umle gemi egä Acejiyame te cebine ama itu nacitepi Miiji Mene ne toraca me awabudnitame. ¹⁷Yoo, pui asicnenta niiya biname poto cidi me, teepi Keriso poto cidi me mene jaajananemusi conocono ngene atwanena cama. Teepi singi lica nuuja biname te awepyeräja ne päpäname, yepä teepi taatu. Teepi apu jaangemuge egä teeme peei mule cabu ca, cebine ngenecu mäpu me pa nawenepi, cane liba ama krokeciye mete cabu säne.

¹⁸Yepä, pepu lica gyene. Cane gege gäne teeme kaakesea poto cidi me, ingle cane singi gäne bucurage biname cina mene jajanena Keriso poto cidi me, ngänu gyene conocono liba pisi nyene teeme mule cabu. Yoo, cane gege cama pa nanajepene, ¹⁹ingle cane umle gäne weeme irecu ätumuta name pi, cuta piiyepu pui ätityera name pi lui tädenige Yeesu Keriso me Seemo cabu ca, cane pa lasatepene. ²⁰Yoo, cäme toraca singi agesa cäme kaakesea cängena wawename, piiyepu airage padare piiyepu iyeta padare cane kokre cama wälu cäco lenajame, naace täápume iyeta cäme mule name pi biname cina Keriso ne awepyeräjame, cäme ireclota cabu ca, coo cäme budre cabu ca. ²¹Yoo, ireclota ngena gyene? Cäme täápume toraca ireclota lui Keriso gome lenajame, cuta cäme budre lui abacita gaabe ten cama iyeteta lenajame. ²²Yepä, cane liba ireclota cama nanajenige cäme cerämu padare piba pisi nyene teeme miiji kaakesea wawename. Yoo, cane ngena täápume singi gäne? ²³Cäme singi neeneni gegi. Cane baborage singi ai ireclota cabu ca asatame Keriso cama iyeteta lenajame, ingle peei lui cäme täápume babo miijirage gyene. ²⁴Yepä, cane cuta singi gäne weebibine ätityerame, peei name pi cäme

singi gyene ireclota cama lenajame. ²⁵Yoo, căme ätityera pisi nyene weeme täápume, peei name pi cane umle gäne egä cane ireclota cama pa nanajepi. Cane weene cama nanajenige weebibine ätityerame weeme ätrunga babo äbitame piyepu peei ätrunga cabu ca weene ngenecu gege äbitame. ²⁶Yoo, cane liba weene cama pa nanajepi, weeme cuta nuuja ingle piba pagege Yeesu Keriso ne awepyeräjame teeme ätityera täápume căme bau me.

²⁷Agesa babo gwidape, weene cängena inajininige Keriso poto cidi me Mijji Mene te lipu jiičenige. Weene piba cängena ätrunga cama jiclaajutenininige, weeme ngene atwanena yepä egä iyeta weeme kokre cama weene Mijji Mene cabu cängena ätrungame. Cane singi pepu pana mule weeme poto cidi me ätecijame, ngänu gyene cane otni weeme bau me, coo otni lica. ²⁸Wälu gone pui biname bime täápume lui cina weebibine mäpu cabu icranininusi, yepä weene mijji ngenecu kokre cama inajipi. Pepu cabu ca pui biname cina ngene ca pa yaaglepesi egä teepi te cirege apesera, yepä weene te weeme mäpu cabu ca cirege äsecrera, ingle Acejiyame weene cama gyene. ²⁹Pepu cirege äbita, ingle Keriso name pi tabe weebibine mijjirage padare ne ituge ceera, lica teebine ätrunga taatu me, yepä cuta teeme täápume mäpu cabu lenajame. ³⁰Yoo, weene piyepu cane, cine yepä mäpu cabu cewe oocananenago, weene lui cabu cebine ituge päpäna, piyepu lui cabu cane cuta page nanajenige, weene lipu itecijenininige.

Iyeta Biname cina Keriso ne Cire Yaawepyeräjepesi

2 ¹Weeme ngenecu kokre liba pisi nyene, ingle weene Keriso me singi yaacatanuye weeme ireclota mule cabu; cuta weeme ngenecu mijji liba pisi nyene, ingle weene umle gemi teeme owecu päpäname; Aceji Seemo te weeme cabu liba enajenige; cuta piyepu weene liba weeme nuuja bine owecu jaawenemuye; ²piba page căme gege ne babo jeweneye. Weene yepä ngene atwanena piyepu yepä owecu cama inajinege. Yoo, weeme singi piyepu ngenecu yepä me äbitineye. ³Nuuja mule ne gone jaawenuye weeme taatu mijji täápume, coo weemämu babo me äbita täápume. Nuuja biname bine niinäce gaabe me icranemeye, piba weemämu teeme ingwe gaabe me äbitineye. ⁴Weeme nuuja biname bime mijji täápume ire cängena, gone singi weeme taatu mijji täápume. ⁵Weene Keriso Yeesu pana mule ne ecateye egä:

⁶Niinäce cabu ca tabe Acejiyame cama yepä ge,

yepä tabe pui Acejiyame cama ibibi ne lica noomluji.

⁷Pui name pi tabe teeme caburage puupu ne teeme singi ca ebmaluji, ätityera biname me äbitame biname bime täápume.

Taba ai gawecewe biname pana äbituji, biname pana tääpe cama lenajame.

- 8 Tabe teemämu gawe me äbituji,
 Acejiyame me singi gaabe cabu otnuji,
 teeme ireclota piba ecäruji baarge uli cabu me budre äbitame.
- 9 Peei name pi Acejiyame teebine ewepäntuji caburage puupu cabu
 me, cuta piyepu teebine babo ngii ecäruji.
 Teeme peei ngii lui baborage gyene iyeta poto ngii cabu ca.
- 10 Piba iyeta lui cina cabucewe je, lui cina ai gawecewe cabu je,
 piyepu lui cina gawe ngalebora je,
 teepi kokorare cire yäapednäremepesi Yeesu me ngii ne
 awepyeräjame,
- 11 piyepu iyeta cina cire jiicepesi egä Yeesu Keriso lui Yageyame
 gyene.
 Aceji Babe siige jamyacu apaclyera ne cire jäpänepi peei cabu ca.

Weene Ngale pana Gemi Ai Gawecewe Biname bime täápume

12 Cäme ngenecurage binamewale, weene cäme singi lipu itu
 nacatepeye, cane liba weene cama ge, yoo, cuta page cäme singi mene
 ne weene ecateye, cane liba weene cama lica gäne. Acejiyame lui
 caburage gyene, peei name pi weene cängena teeme täápume inajipi, pui
 mule taatu jaawenemuye lui cina iyeteta ireclota gaabe cabu weebibine
 iwadininusi. 13 Ingle naace gyene Acejiyame me kaakesea pisi nyene
 weeme cabu, weebibine singi piyepu kokre ceerame teeme singi ne
 cängenarage wawename.

14 Weene weeme kaakesea ngenecu miiji cama jeweneye, äcela piyepu
 äciseräja cäco. 15 Weene pepu Acejiyame me jamyacu bägrä me pa
 äbitipeye, lui cina ibibi gemi ai gawecewe niiya conocono mule biname
 gome epucäco conocäco lenajame. Weene miiji teeme täápume wale pana
 uungepmeläja teeme krokeciye ne äyeblyntame, 16 weene liba teebibine
 mene jaajananemuye ireclota gaabe poto cidi me. Weene liba pepu
 jaawenuye, Keriso me acnenuta bimu cabu, cane piba ngenecu gege cama
 cire nanajepi weeme poto cidi me, ingle piba awabudnita cirege egä cäme
 kaakesea papa me lica ituge äbita.

17 Cane gege gäne, ngänu gyene cebine liba pama budre me naglumi,
 siige cäme uudi te tapiruge kau bime liyepu Acejiyame ne iiwärejame.
 Cäme uudi te piba weeme ätrunga cama yepä läduge Acejiyame bau me
 teebine iiwärejame. Yoo, apu liba wawena je, cane gege birige äbita, cane
 iyeta weene cama gege birige. 18 Piba weene cuta miiji gege läbitininuye,
 weene cane cama gege läbitininuye.

Cane Eproductus naabi Timoti Pa Jäätjepene Weeme bau me

19 Cane cäme ngene atwanena Yageyame Yeesu cabu me itu yaacitepene
 egä cane ibibi pa läbitepene Timoti ne weeme bau me wata ätyepame,

naace täápume cane piba teeme bau ca mene päpäname weeme poto cidi me cebine ngenecu plowa me wawename. ²⁰Cäme nuuja biname lica gyene lui te cane cama yepä ngene atwanena cama gyene, piiyepu lui te toraca singi weebibine ätityerame. ²¹Iyeta nuuja biname cina singi gemi teeme taatu miiji täápume, lica Yeesu Keriso me kaakesea täápume. ²²Yepä, Timoti me miiji mule poto cidi me weene umle gemi. Tabe cane cama kaakesea jaawenuge, epu pana bägrä te teeme babe ne lipu yäätityäruge, ingle cine singi bucurage biname cina Miiji Mene ne ätrungame. ²³Peei name pi cane singi gäne teebine weeme bau me ätyepame, yepä tabe cäme trämä pa yaanajepi ngälu cine umle pa läbitipago cäme täápume lipu pa läbitepi. ²⁴Cane umle gäne egä Acejiyame liba singi gyene, cane cämämu mameta gäne weeme bau me otni.

²⁵Page cane jitränutenine mime ätrunga biname Epaproditus ne weeme bau me ätyepame. Tabe cane cama kaakesea cängena jewenenige cuta cubu jicenige Miiji Mene täápume. Tabe weeme bau ca ätyepäneji gyene cebine ätityerame. ²⁶Tabe baborage singi gyene iyeta weebibine cääri päpäname, piiyepu tabe ngenecu mäpu cama gyene, ingle mene weeme bau me itu lädepi egä tabe pita cama ge. ²⁷Toraca gyene egä tabe pita cama ge, budre mameta, yepä Acejiyame te owecu ge teeme täápume, piiyepu owecu ge cäme täápume, peei name pi teebine miiji itu jaawenepi, peei ngenecu mäpu ne cäme bau ca äyeblyngtame. ²⁸Cane peei name pi babo singi gäne teebine weeme bau me ätyepame egä weene piba ngenecu gege cääri pa äbitipeye, teebine liba pa jepänepeye, cuta piiyepu cäme ngenecu mäpu te teeme poto cidi me piba pa läyeblyngtepi. ²⁹Miiji weene teebine babo gege cama pa ecatepeye mime Yageyame me ngii cabu, piiyepu opo gaabe me icraneye iyeta biname bine lui cina teeme pana mule bine jaawenemusi, ³⁰ingle tabe teeme ireclota taatu me lica ngene jotwananige, yepä mameta ge budre päpäna Keriso me kaakesea name pi. Tabe apu läbitepi, weeme puupu ne liba yaacatepi cebine ätityerame, ingle weene pui ne äblicäco ge wawename.

Acejiyame Mibibine Teeme täápume Conocäco Niwenininuge

3 ¹Cäme ätrunga binamewale, cane singi cerämu mene jajime egä weene Yageyame cabu gege inajininege. Cane gloose lica gäne gwidape poto cidi me oogärame, cane lui bime poto cidi me ituge oogära, weene piba cängengarage lenajame cane liba ai mene cääri jijenininine. ²Cängena ire biname bime poto cidi me lui cina niya mule bine jaawenemusi, peei drego bime täápume lui cina singi gemi nuuja ätrunga biname bime tääpe matikolä iirputame Acejiyame me cewecu acatame. Teepi walya jicusi egä lui biname me tääpe cabu cewecu lica birige, tabe äblicäco Acejiyame me biname me äbita. ³Yepä, mine lui cina Acejiyame

ne ngene jepecnäjensis Aceji Seemo me ätityera ca, piyepu babo gege cama Keriso Yeesu ne jitrungenisi mibibine waadename, mine age temi Acejiyame me toraca binamewale. Tääpe cabu lui cewecu ngänu gyene, ingle peei cabu ca mine äblicäco Acejiyame me binamewale me äbita, ingle mine äblicäco mime tääpe mule bine ätrunga mibibine Acejiyame bau me waadename. ⁴Yoo, niinäce cane liba Yeesu ne lica jitrungujine, pui padare cabu cane cäme tääpe mule cabu me ätrunga ecitujine. Pui sasa padare cabu cane pepu mule bine baborage jitrungemujine nuuja biname bime cabu ca, ⁵ingle naace popi cane liba aplimlujine seven bimu liba nanajuji, cäme tääpe matikolä nirputujisi cewecu wawenname. Cuta cäme mage babe Israela biname ge Benjamina me ingle cabu ca, piyepu cäme kaakesaare iyeta lui Heberu mene jicemusi. Cuta piyepu cotre bine cane Parisea biname bime mäpu gaabe ca jewenemujine. ⁶Cäme singi baborage ge Acejiyame me kaakesea wawenname, siige cane Yeesu me ätrunga biname bine mäpu me jaawenemune. Yoo, cane iyeta mule cotre mene ibibi ituge wawena, naace tääpume cane peei gaabe ca conocäco äbitame Acejiyame me opo gaabe je. ⁷Yepä, iyeta peei mule bine cane lui poto cidi me apu nangenuji egä miijirage gemi cäme tääpume, page cane opo ewatnenine egä teepi nuuja miiji lica gemi, Keriso me ätityera name pi. ⁸Toraca cane opo ewatnenine egä iyeta papa ge, yepä taatu gwidape baborage gyene. PEEI babo gwidape lui naace gyene cane umle gäne Yeesu Keriso cäme Yageyame. Yoo, Yeesu Keriso name pi iyeta cäme sasa mule bine domäji pana cane itu ebmalemujine Keriso me ingle cabu me abacitame, ⁹ten cabu lenajame. Page cane licarage cäme miiji mule piyepu cotre waweneca bine jitrungenemine Acejiyame tääpume conocäco äbitame, yepä cane Keriso ne jitrungenine cebine Acejiyame tääpume conocäco wawenname. PEEI ätrunga gaabe Acejiyame cama conocäco äbitame lui teeme bau ca gyene, piyepu biname cina peei ne jääpänusi, Keriso ne liba jäätrungusi. ¹⁰Page cäme nuuja singi lica gyene, yepä Keriso tääpume toraca umle äbitame, piyepu lui babo kokre te teebine budre cabu ca itu erpinantuji, peei te cäme ireclota cabu lenajame. Cane singi gäne teeme pana ngene cewe oocanena päpäname ireclota cabu piyepu teeme pana äbitame tabe lipu teeme budre padare cabu ge, ¹¹ingle cane singi gäne Acejiyame te piba cuta cebine budre cabu ca arpinentame iyeteta ireclota me.

Acejiyame te Mibibine Ituge Asogleca Yeesu pana Mule Wawenname

¹²Cane lica jicenine egä cane uja conocäco me ituge äbita; camu gyene cäme ireclota mule toraca miiji me äbita. Yepä, cane cängena apicetnärenine conocäco ireclota mule ne oomlaname, ingle Yeesu Keriso te cebine teeme tääpume ituge oomlana. ¹³Yoo, cäme ätrunga binamewale, cane apu lica nangeninige egä cane conocäco ireclota cama

gäne, yepä cane apu jewenenine: iyeta poto cidi me lui ituge niinäce äpletnera, cane singi ngene ätrimela, pui ne oomlaname lui te niinäce gaabe gyene. ¹⁴Cane uuwama bääclena biname pana gäne. Cane niinäce gaabe me ire nacijinige ngälu gaabe ne oomlaname, naace täápume cäme miiji daremu ne acatame. Peei daremu lui iyeteta ireclota gyene cabucewe je, Acejiyame lui täápume cebine ituge ala asogleca cane Yeesu Keriso bau ca päpäname. ¹⁵Yoo, mine iyeta lui cina Seemo ireclota cabu ninajininige, mine miiji pepu pana ngene atwana cama lenajame, piiyepu weene liba mara ngene atwana cama gemi yepä gwidape poto cidi me, Acejiyame cuta peei ne pajecu me pa jaawenepi weeme täápume. ¹⁶Yoo siige, mine niinäce gaabe me naclege pui umle cabu lui pisi nyene page.

¹⁷Cäme ätrunga binamewale, cäme pana mule weene gigri jewenemeye. Teeme mule abiberäjineye lui cina toraca gaabe cabu otni, cine lui gaabe weeme täápume ituge awabudnita. ¹⁸Cane lui täápume weebibine bucurage padare ituge jajanena, cuta page ele mäcu cama cääri jjenininine egä bucurage biname piti nemi lui cina cubuyame gemi Keriso me budre täápume baarge uli cabu teeme conocono ireclota name pi. ¹⁹Teepi niya puupu me cirege otni, ingle teeme yepä taatu ngene atwanena pisi nyene, teeme tääpe me singi bine wawenecame. Teepi gege gemi mule poto cidi me, teepi lui poto cidi me ajiri cire läbitinejisi. Iyeta teeme ngene atwanena lui singi taatu ai gawecewe me gwidape täápume. ²⁰Yepä, mime täápume ireclota mara gyene. Mime toraca cewe lui cabu sine. Mine mime niya cabu ca äsecrera biname ne cängena jewagrijenisi cabucewe ca mime bau otnime, peei lui Yageyame Yeesu Keriso sine. ²¹Tabe te mime gawecewe tääpe bine cirege atep lengäja teeme jamyacu apaclyera cama tääpe pana äbitame, pui kokre ca tabe lui ca ibibi gyene iyeta gwidape bine teeme ime cabu acraname.

Paulo te Bäärmi Mene Jegednemige

4 ¹Cäme ngenecurage binamewale, cane baborage singi weeme täápume weene cama lenajame. Weene cebine ngenecu gege me naweneniye, piiyepu cane awepyeräja ne jepänenine weeme name pi. Yoo, cäme ätrunga binamewale, weene miiji kokre aclajutame Yageyame cabu.

²Yoo, neeneni magebi Ewodiya piiyepu Suntuke, owecu, cäme singi weene ecateye yepä ngene atwanena cama Yageyame cabu lenajame. ³Yoo, piiyepu Sujugu, lui cane cama miijirage kaakesea ituge wawena, cane singi gäne maane ai neeneni magebi bine ätityerame teeme miise mule ne abmalame, teepi lui cina cane cama baborage kaakesea ituge wawena biname bine Miiji Mene jajanenename. Teepi gigri kaakeseyame gegi Klemente cama piiyepu iyeta nuuja biname cama lui cina cane cama kaakesea ituge jaawenemepesi, lui bime ngii Acejiyame bau oogäräneji

gemi teeme peba cabu, iyeta lui cina kirece ireclota Keriso bau ca cire jääpänesi.

⁴Ngeneцу gege äbitineye weeme Yageyame cabu ireclota tääpume. Cane cääri jijenine, weene ngenecu gege!

⁵Weene miiji owelaamelame lenaja iyeta biname bime tääpume. Yageyame me acnenua lui mameta gyene. ⁶Gone ngenecu mäpu läbitininuye nuuja gwidape tääpume, yepä weene liba Acejiyame ne yaawejanuye, teebine yäätinäruye iyeta weeme singi gwidape tääpume, piyepu ngenecubora ca teebine eso yäacäruye. ⁷Piyepu weene liba ngenecu poode Acejiyame bau ca jääpänuye, piba weeme ngene atwanena piyepu weeme singi Yeesu Keriso cabu cängenarage birige. Yoo, biname cina äblicäco gemi cängena umle äbita pepu ngenecu poode ne.

⁸Ceräcerägäabu bääirmi mene age sena. Cäme ätrunga binamewale, weene ai gwidape poto cidi me ngene jwaatwa-naninuye: iyeta lui toraca gemi, lui bine opo gaabe me yaacranemusi, lui gwidape conocäco gemi, lui bine jugi cäco ngene atwana cama gemi, lui jamyacu gemi, lui bine jääpänemusi egä miijirage gemi, lui epucäco gemi, piyepu lui bine ibibi gemi awepyeräja tääpume. ⁹Cane lui abiberäja weebibine ituge ceera cäme mene piyepu cäme mule cabu ca, weene pepu jaawenemuye. Piba Acejiyame, lui te mibibine ngenecu miiji niwenininige, mine cama pa yaanajepi.

Paulo te Pilipi Ätrunga Ingle Biname bine Eso Jejemige Teeme Ätityera tääpume

¹⁰Cane ngenecu gege gäne piyepu cane Yageyame ne ewepyeräjenine egä padare te tatyaramtumi weene cebine cääri ätityerame. Weeme puu singi puga ge pui ne wawename, yepä leca padare cabu weeme gaabe ätityerame lica ge. ¹¹Cane ai mene naace name pi lica jijenininine ingle cane gwidape tääpume singi gäne. Pepu lica ge, ingle cane umle ituge äbita ngenecu gege cama lenajame, ngänu gyene cäme gwidape liba nesae. ¹²Cane umle gäne owecumete pana lenajame piyepu cane cuta nuuja taje umle gäne bucurage gwidape cama lenaja. Cane umle gäne iyeta padare iyeta poto ta ngenecu gege cama lenajame. Ngänu gyene cäme deedei liba bucurage, coo cäme deedei liba nesae; cäme gwidape liba bucurage, coo cäme singi gwidape liba lica gemi, cäme ngenecu gege cuta pisi nyene. ¹³Keriso te cebine kokre me nawenenige iyeta gwidape tääpume.

¹⁴Yepä, weeme mule babo miijirage gyene cebine cäme mäpu cabu ätityerame. ¹⁵Yoo, weene Pilipi biname umle gemi egä lui padare cabu cine gije jebacitujisi Miiji Mene jajanename, cane pui padare cabu liba Makedoniya probins ne sebmajine pui Miiji Mene nuuja poto jajanename, weeme ätrunga ingle te taatu nätityäruji cebine, weene liba

rarekaake näcärujiye. ¹⁶Cane liba Tesalonika cewe cabu je, weene cuta piba cebine nätinyärujiye lica yepä gääbu taatu, yepä cuta nuuja taje weene nätinyärujiye. ¹⁷Yoo, cäme singi lui lica gyene owecu gwidape päpäna taatu me, yepä cane singi gäne weene pepu mule wawenecame, piba miiji daremu peei cabu ca päpäname. ¹⁸Yoo, cane age eso mene ne yoogärenine iyeta weeme ätityera täápume. Peei ätityera lui ibibi gyene. Cäme singi gwidape ibi piti nemi page, ingle Epaproditus te bii sewadenemige wemiji gwidape bine. Weeme ätityera gwidape lui epu pana iiwäreja mule liiyepu Acejiyame täápume. Tabe baborage singi gyene pepu ätityera mule päpäname. ¹⁹Yoo, Yeesu Keriso me kaakesea name pi mime täápume, Acejiyame te iyeta weeme singi gwidape bine icärininuge teeme jamyacu dogwe cabu ca. ²⁰Mine miiji Acejiyame mime Babe ne awepyeräja iyeteta ngälu cäco teeme jamyacu apaclyera täápume. Pepu pa yaanajege!

Ai Peba me Apira Mene

²¹Cane sebore jiwenininine iyeta Acejiyame me biname bine lui cina Yeesu Keriso memi. Mime ätrunga binamewale lui cina age temi cane cama, teepi te weebibine sebore jiwenininisi. ²²Iyeta Acejiyame me biname cina weebibine sebore jiwenininisi, yepä toraca teepi lui gemi Rooma Babo Mopeyame me mete cabu kaakesea jewenenisi.

²³Yageyame Yeesu Keriso me miiji te weeme seemo bime cabu lenajame.

Cane ngii Paulo; cäme mene ngälu peese.